

بِسْمِ اللّٰهِ الرَّحْمٰنِ الرَّحِيْمِ

নিখিলবিশ্ব আহমদীয়া মুসলিম জামাতের বর্তমান ইমাম ও আমীরগুল মু'মিনীন হ্যরত মির্যা
মসরুর আহমদ খলীফাতুল মসীহ আল খামেস (আই.) গত ১৫ই জুলাই, ২০২২ ইসলামাবাদের
মসজিদে মুবারকে প্রদত্ত জুমুআর খুতবায় হ্যরত আবু বকর সিদ্দীক (রা.)'র স্মৃতিচারণ প্রসঙ্গে তাঁর
খিলাফতকালে সশন্ত বিদ্রোহী এবং ইরাক অঞ্চলে ইরানীদের বিরুদ্ধে পরিচালিত যুদ্ধাভিযান সম্পর্কে
আলোচনা করেন।

তাশাহুদ, তা'উয় ও সূরা ফাতিহা পাঠের পর হ্যুর (আই.) বলেন, মুরতাদ বিদ্রোহীদের
বিরুদ্ধে মুসলমানদের গৃহীত বিভিন্ন পদক্ষেপ সম্পর্কে আলোচনা হচ্ছিল। হ্যরত মুহাজির ও ইকরামা
(রা.)'র কিন্দা ও হায়ারা মওত অঞ্চলে বিদ্রোহীদের বিরুদ্ধে গৃহীত পদক্ষেপ সম্পর্কে বর্ণিত হয়েছে
যে, হ্যরত মুহাজির (রা.) সানা'য় নিজের অবস্থান সুদৃঢ় করে হ্যরত আবু বকর (রা.)'র কাছে পত্র
মারফৎ পুরো বৃত্তান্ত জানান। ইতোমধ্যে হ্যরত মুআ'য বিন জাবাল (রা.) এবং ইয়েমেনের অন্যান্য
গভর্নররা খলীফার কাছে পত্র মারফৎ মদীনায় ফিরে যাবার অনুমতি প্রার্থনা করেন। আবু বকর (রা.)
তাদের এই শর্তে অনুমতি দেন যে, মদীনায় ফেরত আসার আগে তারা যেন নিজ নিজ স্থানে অন্য
কাউকে নিযুক্ত করে আসেন; তারা সবাই সেই মোতাবেক মদীনায় ফিরে আসেন। হ্যরত আবু
বকর (রা.), মুহাজির (রা.)-কে নির্দেশ দেন, তিনি যেন হ্যরত ইকরামা (রা.)-কে সাথে নিয়ে
হায়ারা মওত যান এবং হ্যরত যিয়াদ বিন লাবীদকে সাহায্য করেন; ওদিকে ইকরামাকেও মুহাজির
বিন আবু উমাইয়ার সাথে কিন্দা গোত্র অভিমুখে যাত্রা করার নির্দেশ দেন।

কিন্দার বিদ্রোহ দমন সম্পর্কে তাবারীর ইতিহাসে বর্ণিত হয়েছে, মুরতাদ হবার পূর্বে যখন
কিন্দা এবং হায়ারা মওত অঞ্চলে সবাই মুসলমান হয়ে গিয়েছিল তখন মহানবী (সা.) কিন্দার আংশিক
যাকাত হায়ারা মওতে ও হায়ারা মওতের আংশিক যাকাত কিন্দায় ব্যয় করার নির্দেশ দিয়েছিলেন।
সেসময় কিন্দার লোকেরা বলেছিল, তাদের কাছে যাকাত পরিবহনের উট নেই; মহানবী (সা.) যেন
হায়ারা মওতবাসীদের নিজেদের বাহনে করে যাকাতের সম্পদ কিন্দায় পৌছে দিতে বলে দেন।
মহানবী (সা.) হায়ারা মওতের লোকদের বলেন, সম্ভব হলে তারা যেন তাদেরকে এটুকু সহায়তা
করেন; তারাও বলে, কিন্দার লোকদের কাছে বাহন না থাকলে তারা পৌছে দেবে। মহানবী (সা.)-
এর মৃত্যুর পর হ্যরত যিয়াদ (রা.) যখন যাকাত প্রদানের জন্য সবাইকে নিজের কাছে ডেকে পাঠান
তখন কিন্দার লোকেরা তাকে তাদের কাছে যাকাতের সম্পদ পৌছে দেয়ার কথা স্মরণ করিয়ে দেন।
যেহেতু তখন তাদের কাছে পণ্যবাহী পশ্চ ছিল সেজন্য যিয়াদ (রা.) সেগুলোতে করে তাদের ভাগ
নিয়ে যেতে বলেন। পণ্যবাহী পশ্চ থাকা সত্ত্বেও তাদের এরূপ দাবি যিয়াদ (রা.) নাকচ করে দেন,
আর কিন্দিরাও তাদের দাবিতে অনড় থাকে; এই একগুঁয়েমি ভাব নিয়েই তারা ফিরে যায় এবং
তাদের আচরণে দোদুল্যমানতা পরিলক্ষিত হয়। হ্যরত যিয়াদ তাৎক্ষণিক তাদের বিরুদ্ধে কোন
পদক্ষেপ নেন নি, বরং হ্যরত মুহাজির (রা.)'র আগমনের অপেক্ষা করতে থাকেন। হ্যরত মুহাজির
ও ইকরামা (রা.) মাআরেব নামক স্থানে একত্রিত হন এবং সুহায়েদ মরুভূমি পাড়ি দিয়ে হায়ারা
মওত- এ পৌছেন।

কিন্দিরা যখন হ্যরত যিয়াদের প্রতি রুষ্ট হয়ে ফিরে যায়, তখন থেকে বনু আমর গোত্রের যাকাত সংগ্রহের ভার যিয়াদ (রা.) নিজের ক্ষপ্তে তুলে নেন। ঘটনাচক্রে কিন্দার এক যুবক ভুলক্রমে তার ভাইয়ের একটি উট যাকাত হিসেবে প্রদান করে; সেটিকে যাকাতের উট হিসেবে চিহ্ন দিয়ে দেয়ার পর সে সেটি পরিবর্তন করতে আসে, কিন্তু হ্যরত যিয়াদ ভাবেন- সে হয়ত ইচ্ছা করেই টালবাহানা করছে, এজন্য তিনি তা বদলাতে দেন নি। তখন ঐ যুবক তার গোত্রের লোকজনকে ডাকে যাদের মাঝে আবু সুমাইদ নামক এক ব্যক্তিও ছিল; তারা অনেক পিড়াপীড়ি করে, কিন্তু যিয়াদ (রা.) তার সিদ্ধান্তে অনড় ছিলেন। আবু সুমাইদ তখন রেগে গিয়ে নিজেই জোর করে উটটিকে ছেড়ে দেয়। এতে হ্যরত যিয়াদের লোকেরা আবু সুমাইদ ও তার সঙ্গীসাথীদের বন্দি করে। তারা তখন তাদের দলের অন্য লোকদের সাহায্যের জন্য ডাকাডাকি করে, ফলে বনু মুয়াত্তিয়া তাদের সাহায্যকল্পে এগিয়ে আসে এবং হ্যরত যিয়াদের কাছে তাদেরকে মুক্ত করার দাবি জানায়। যিয়াদ (রা.) তাদেরকে বলেন, তারা এখান থেকে সরে না যাওয়া পর্যন্ত তিনি এদেরকে ছাড়বেন না। কিন্তু তারা তা না শনে দাঙ্গা বাধানোর উপক্রম করলে যিয়াদ (রা.) তাদের আক্রমণ ওপর করেন; এতে তাদের অনেকে নিহত হয় আর অনেকে পালিয়ে যায়। যিয়াদ ফিরে এসে বন্দিদের মুক্তও করে দেন, কিন্তু তারা কৃতজ্ঞ হবার পরিবর্তে দেশে ফিরে গিয়ে যুদ্ধের প্রস্তুতি নিতে আরম্ভ করে; বনু আমর বিন হারেস, আশ'আস বিন কায়েস এবং সিমত্ বিন আসওয়াদ গোত্র নিজ নিজ অঞ্চলে গিয়ে যাকাত প্রদানে অঙ্গীকৃতি জানিয়ে বসে এবং মুরতাদ হয়ে যায়। ফলে হ্যরত যিয়াদ (রা.) সৈন্যদল নিয়ে বনু আমরের ওপর আক্রমণ করেন, তাদের অনেককে হত্যা করেন এবং বিশাল একটি সংখ্যাকে বন্দি করে মদীনায় পাঠিয়ে দেন। কিন্তু পথিমধ্যে আশ'আস ও বনু হারেস গোত্র আক্রমণ করে বন্দিদের ছাড়িয়ে নিয়ে যায়। এই ঘটনার পর ঐ এলাকায় অনেক গোত্রই মুরতাদ হয়ে বিদ্রোহ ঘোষণা করে বসে। যিয়াদ (রা.) হ্যরত মুহাজিরকে পত্র লিখে পরিষ্ঠিতি জানালে তিনি বাহিনী নিয়ে কিন্দাকে আক্রমণ করেন; কিন্দিরা পালিয়ে গিয়ে নুজাইর নামক তাদের একটি দুর্গে আশ্রয় নেয়। এই দুর্গের তিনটি প্রবেশ পথ ছিল, একটি পথে যিয়াদ ও আরেকটিতে মুহাজির (রা.) অবস্থান নেন; তৃতীয় পথটি কিন্দিদের দখলে ছিল, তবে হ্যরত ইকরামা (রা.) এসে সেই পথটিও অবরোধ করেন। পরিষ্ঠিতি দেখে কিন্দিরা ভীত হয়; তাদের এক নেতা আশ'আস হ্যরত ইকরামা (রা.)'র কাছে গিয়ে নিরাপত্তা প্রার্থনা করে। ইকরামা (রা.) তাকে হ্যরত মুহাজিরের কাছে নিয়ে গেলে সে প্রস্তাব দেয়, তাদের দশ ব্যক্তিকে নিরাপত্তা প্রদান করলে তারা গিয়ে গোপনে দুর্গের দরজা খুলে দেবে। মুহাজির (রা.) তার প্রস্তাবে সম্মত হন। কিন্তু আশ'আস তাড়াহড়ো করতে গিয়ে তালিকায় নিজের নাম লিখতেই ভুলে যায়। অতঃপর পরিকল্পনা অনুসারে দুর্গের ফটক খুলে দেয়া হয় এবং মুসলমানরা দুর্গ জয় করেন, এমসময় সাতশ' কিন্দি পুরুষ নিহত হয় এবং সহস্র কিন্দি নারী বন্দি হয়। যখন চুক্তিপত্র আনা হয় তখন দেখা যায়, সেখানে বাকি নয়জনের নাম থাকলেও আশ'আসের নাম নেই। মুহাজির তাকে হত্যা করতে মনস্ত করলেও ইকরামা (রা.)'র অনুরোধে অন্য বন্দিদের সাথে তাকে মদীনায় পাঠিয়ে দেন। মদীনায় হ্যরত আবু বকর (রা.) আশ'আসকে তার কৃতকর্মের জন্য অনেক তিরক্ষার করেন এবং তাকে মৃত্যুদণ্ড দেবেন বলে জানান; আশ'আস তখন বলে যে, সে নিজ গোত্রের নয়জনের প্রাণ বাঁচিয়েছে, তাকে হত্যা করা কি সমীচীন হবে? আশ'আস এক পর্যায়ে খলীফার কাছে নিবেদন করে,

আমার জাতির বন্দিদের মুক্ত করে দিন আর আমার ভুলক্ষণটি ক্ষমাপূর্বক আমার ইসলাম গ্রহণ করুন এবং আমার স্ত্রীকে আমার হাতে তুলে দিন। উল্লেখ্য, মহানবী (সা.)-এর জীবদ্ধশায় আশ'আসের সাথে হয়রত আবু বকর (রা.)'র বোন উষ্মে ফারওয়ার নিকাহ হয়েছিল এবং পরেরযাত্রায় আশ'আস এলে রুখসাতানা হবে বলে সিদ্ধান্ত হয়েছিল; আশ'আস আবার আসার আগেই বিদ্রোহের ঘটনা ঘটে। হয়রত আবু বকর (রা.) তখন তাকে মার্জনা করেন এবং তাকে ফিরে যাবার সুযোগ দিয়ে বলেন, ভবিষ্যতে যেন তার সম্পর্কে ইতিবাচক সংবাদই পাওয়া যায়। তবে আশ'আস কিন্দায় আর ফিরে যান নি, বরং মদীনাতেই অবস্থান করেন; হয়রত উমর (রা.)'র যুগে সিরিয়া ও ইরাকের যুদ্ধে তিনি অসাধারণ বীরত্বও প্রদর্শন করেছিলেন। হয়রত ইকরামা ও মুহাজির (রা.) কিন্ডা ও হায়ারা মওতে দৃঢ়ভাবে ইসলাম প্রতিষ্ঠা করেন। এই যুদ্ধের মধ্য দিয়ে আরব ভূখণ্ডে মুরতাদদের বিদ্রোহ সম্পূর্ণরূপে নির্মূল হয়।

হ্যুর (আই.) বলেন, মওলানা মওদুদী সাহেব সহ অধিকাংশ লেখকের ধারণা হলো, নবুয়তের মিথ্যা দাবি করায় হয়রত আবু বকর (রা.) তাদের বিরুদ্ধে এরূপ কঠোর ব্যবস্থা গ্রহণ করেন এবং এটিই শরীয়তের নির্দেশ; কিন্তু যারা ইতিহাস জানেন তারা একথার সাথে একমত হবেন না। হয়রত মুসলেহ মওউদ (রা.) মওলানা মওদুদী সাহেবকে উদ্দেশ্য করে বলেন, আপনি ইসলামী সাহিত্য অধ্যয়নের দাবি করেন অথচ এসব বিদ্রোহীকে দমনের মূল উদ্দেশ্য সম্পর্কেই আপনি অনবহিত। হয়রত মুসলেহ মওউদ (রা.)-এর এই উদ্বৃত্তিটি হ্যুর তুলে ধরেন যেখানে তিনি (রা.) বিদ্রোহীদের দমনের মূল কারণ বিশদভাবে ব্যাখ্যা করেছেন যে, মুসায়লামা, তুলায়হা, সাজাহ এবং আসওয়াদ আনসী- এদের বিরুদ্ধে অভিযান পরিচালনার কারণ নিছক তাদের নবুয়তের দাবি ছিল না, বরং তাদের সশন্ত বিদ্রোহ, নিরিহ মুসলমান বা মুসলিম কর্মকর্তাদের হত্যা, উৎখাত এবং দেশে ভয়ংকর বিশৃঙ্খলা সৃষ্টির কারণে তাদের বিরুদ্ধে কঠোর পদক্ষেপ গ্রহণ করা হয়েছিল।

পুরো আরবজুড়ে ফুঁসে ওঠা ভয়ংকর বিদ্রোহ ও ধর্মত্যাগের হিড়িক হয়রত আবু বকর (রা.) যে দক্ষতা, দ্রুততা ও বিচক্ষণতার সাথে সামাল দেন এবং এক বছরেরও কম সময়ের ভেতর তা সম্পূর্ণরূপে নিশ্চিহ্ন করেন- এটি একদিকে যেমন হয়রত আবু বকর (রা.)'র অসাধারণ যোগ্যতা এবং পারদর্শিতার পরিচায়ক, অন্যদিকে তাঁর প্রতিটি পদক্ষেপে আল্লাহ্ তা'লার সাহায্য ও সমর্থনেরও প্রমাণ। তিনি ইসলামের বিজয় এবং পুনঃপ্রতিষ্ঠায় যারপরনাই আনন্দিত ছিলেন, কিন্তু এতে তাঁর এক ফৌটাও অহংকার বা গর্ব ছিল না, কারণ তিনি জানতেন এটি একমাত্র আল্লাহ্ কৃপাতেই সন্তুষ্ট হয়েছে। আর তিনি এ-ও বুঝাছিলেন, ইসলামের এই বিজয় দেখে বাইরের পরাশক্তিগুলো পুনরায় আরবে বিশৃঙ্খলা ও বিদ্রোহ সৃষ্টি করতে চাইবে; তাই আরবের সীমান্ত এবং ইসলামকে নিরাপদ রাখার উত্তম উপায় হলো, পারস্য এবং রোমান সাম্রাজ্যে ইসলামের তবলীগ ও প্রচার ছড়িয়ে দেয়া। তবে হয়রত আবু বকর (রা.) নিজ থেকে কোন পদক্ষেপ নেয়ার আগেই তিনি সংবাদ পান, হয়রত মুসান্না বিন হারেসা, যিনি বাহরাইনে মুরতাদ বিদ্রোহীদের দমনের ক্ষেত্রে বিশেষ ভূমিকা পালন করেছিলেন, তিনি ইরাক অভিমুখে অগ্রসর হয়েছেন এবং দজলা ও ফুরাত নদীর বদ্বীপ অববাহিকায় বসবাসরত আরব গোত্রগুলো পর্যন্ত পৌঁছে পিয়েছেন। সেখানকার কৃষিজীবি আরবরা স্থানীয়দের নিপীড়নের শিকার ছিল, এজন্য হয়রত মুসান্না হয়রত আবু বকর (রা.)'র কাছে ইসলামী বাহিনী

পাঠ্যে সাহায্য করার আবেদন জানান। কতক বর্ণনামতে হয়রত মুসান্না মদীনায় যান নি বা এরূপ কোন পত্রও প্রেরণ করেন নি, বরং তিনি যে অগ্রসর হতে হতে ইরানী সেনাপতি হরমুয়ের বাহিনীর সাথে যুদ্ধেরত তা আবু বকর (রা.) জানতে পেরে নিজে থেকেই হরমুয়েকে পরাজিত করতে হয়রত খালিদ বিন ওয়ালীদের নেতৃত্বে সেনাদল পাঠান। এছাড়া হয়রত আইয়াফ বিন গানামকে দুমাতুল জান্দাল প্রেরণ করেন সেখানকার বিদ্রোহীদের দমনের জন্য; তাদের উভয়কেই কাজ শেষে হীরা অভিমুখে অগ্রসর হবারও নির্দেশ দিয়ে দেন। এসব যুদ্ধের বিশদ আলোচনা আগামীতে করা হবে বলে হ্যুর (আই.) জানান।

[প্রিয় পাঠকবৃন্দ! হ্যুরের খুতবা সম্পূর্ণ শোনার কথনোই কোন বিকল্প নেই, আমরা সময়ের প্রতি লক্ষ্য রেখে খুতবার সারমর্ম উপস্থাপন করছি মাত্র। আপনাদেরকে হ্যুরের পুরো খুতবাটি শোনার অনুরোধ রইল। হ্যুরের খুতবাটি পুরো শুনতে পাবেন আমাদের এমটিএ'র নিয়মিত ওয়েবসাইট অর্থাৎ, www.mta.tv এবং আমাদের কেন্দ্রীয় বাংলা ওয়েবসাইট www.ahmadiyyabangla.org -এ]